

**Mbete kí dɔsay kí
Piyər
ndàngì**

**Ta-je kí dɔ mbete-ti kí dɔsay
kí Piyər ndàngì**

Njèkɔwkułə Piyər ndàngì mbete kin adi njèkadmeɛ-je kí 'sane-na dɔnangi-ti lə dow-je kí Rɔm, dɔnangi Aji-ti kí ngon-é (kí bone bè 'ba-é Turki). Ɛ ndigì kulə dingəm meɛ-dé-ti dan kò-je-ti kí d'isi d'ingə ngá kin rəm, bá ndigì kadi-dé tógi kɔ kò-je kí d'ow kì kingə kì kingə bəy kin rəm.

Piyər lé, to dow káre dan dow-je-ti kí boy kí ri-é tò meɛ mbete-je-ti lə Matiye, kì Marki, kì Luki, kì Ja, rəm tò meɛ Mbete kullə-ti lə Njèkɔwkułə-je kí kù lo kɔr-é-je-ti 1-10 rəm tɔ. 'Gə-é kì ri-é kí Simɔ. Jeju mbəti-é adi-é to kí káre dan njéndó né-je-ti liə kí dɔgi gidi-é joo, ə ində ri-é lə Piyər (Mark 3:16-17). Go-ti, loki Jeju təl ow dɔrɔ-ti gogi lé, Piyər ingə tógi ilə-né mbə Poyta kí Maji kí sobi dɔ kaji dan jipi-je-ti rəm, dan jipi al-je-ti rəm. Lo kɔr-é-ti kí 5:13 lé, Piyər tɔji kí n'ndàngì mbete kinlé dɔnangi Babilɔn-ti kí d'un d'ɔji-né bebo Rɔm.

Kɔ ta-je kí boy-boy ra mutə meɛ mbete-ti kin adi to ta kí sobi dɔ: Kaji rəm, kulə dɔ gin tógi-ti rəm, bá kò rəm. Kulə gin-é-ti lé, Piyər ra oiyo Lubə kɔ kaji kí tò kì takul Jeju Kristi ə ole-né meɛ njèkadmeɛ-je kí dɛ lé Lubə oji-dé koji kí

sigi, kɔɔ nékində mɛɛ dɔ-ti kí tò kəm. E ulə dingəm mɛɛ-dé-ti kadi panjiyə-dé aa njay, kɔɔ kadi kaji kinlé tɔji-né rɔ-é ndaa-ti rəsi. Tò kadi dɛ d'a tɔji kullə ra-dé kí maji kì kəm rəbi kulə dɔ gin tógi-ti adi dɛ lay ya kadi d'ulə dɔ-dé gin tógi-ti lə njékɔbe-je; kadi bə-je d'ulə dɔ-dé gin tógi-ti lə 'ba-dé-je; kadi dené-je d'ulə dɔ-dé gin tógi-ti ngow-dé-je ə kadi dingəm-je d'un ta ne-dé-je. Kí sobi dɔ kò rəmə, njékadmɛɛ-je lé, lé dow-je d'ulə kəm-dé ndoo titi kí ndəki d'ulə-né kəm Jeju ndoo kin bə kàrè, kadi d'adi to rɔ-dé al. To kəm rəbi kí tò kɔɔ kadi d'ingə-né kò kɔɔ ta liə.

Tɔji rɔ kì lapiya kí ra

¹ Mə Piyər, njəkowkulə lə Jeju Kristi, bá m'ndàngi mbete kin m'adi-si səi kí Lubə mbəti-si kí ayi isi bembə-je-ti dɔnangi Pɔ-ti, kì dɔnangi Galati-ti, kì dɔnangi Kapadosi-ti, kì dɔnangi Aji-ti, kì dɔnangi Bitini-ti.

² Mbəti kí Bəbi-ji Lubə mbəti-si kinlé, to kɔjra liə kí ɔji kete low nɔ bá adi Ndil kí aa njay ində-si tagay kadi 'təli-né rɔ-si go ta-ti lə Jeju Kristi rəm, kadi məsi-é bɔr-né majal-je lə-si kɔgi rəm. Kadi ramaji kì lapiya lə Lubə nəy sə-si dɔ madi-é-ti kì dɔ madi-é-ti.

Kaji to nékində mɛɛ dɔ-ti kí maji nɔ

³ Kɔsgaji to 'lə Lubə kí to Bəbi 'Bəbe lə-ji Jeju Kristi. To kí Lubə to njəkoo kəmtondoo kí nɔ lé bá oji-ji-né koji kí sigi kì takul tɔsi kí Jeju Kristi tɔsi ndəl ində lo tɛɛ dan dow-je-ti kí d'oy, adi j'owi kì nékində mɛɛ dɔ-ti lə-ji kí tò sartagangi rəm,

⁴ nékugə doji kí à ndum al rəm, à tò n̄e al rəm, bá ndole-é à tò lo tò-é-ti rəm ya tò dor̄a-ti n̄ɔɔ tò ngəbi-ji,

⁵ jəi kí tógi lə Lubə ngəm-ji k̄i takul kadmeɛ kdo kaji kí tò pèrèrè kadi tɔji rɔ-é ndaa-ti rəsi meɛ ndo-je-ti kí dobəy-ti.

⁶ Gin-é kin bá, lé isi ingəi k̄ɔ-je kí gay-gay kaglo-je-ti kí s̄e kí ngosnè kin kàrè, səi 'rai-né rənəl; k̄ɔ-je lé tò kadi à ree do-si-ti kdo n̄a-si koo ya.

⁷ Kdotalə lɔr kí à tuj̄i bəy kin kàrè d'ulə pərəə bá d'or njar-é; beba kadmeɛ lə-si kí to né kí maji n̄a itə lɔr kinlé kàrè d'a n̄a-é dan k̄ɔ-je-ti koo, kdo kadi go-ti rəmə ingəi tóy, k̄i kɔsgaji, k̄i riba ndo-ti kí Jeju Kristi à tɔji-né rɔ-é ndaa-ti rəsi takəm dow-je-ti.

⁸ Kristi lé, səi ooi-é al ya 'ndigi-é rəm, səi ooi-é al bəy ya adi-é meɛ-si rəm ə 'rai rənəl kí to rənəl kí dum pa rəm, to rənəl kí riba-é n̄a rəm,

⁹ kdo kaji kí aji kinlé to nékugə doji kadmeɛ lə-si.

Ta kí sobi do njépata-je kí ta Lubə-ti, k̄i kaji

¹⁰ Njépata-je kí ta Lubə-ti kí 'pa ta kí sobi do ramaji lə Lubə kí tò kdo ta lə-si kinlé, 'ndər gin ta kí sobi do kaji kinlé n̄a rəm, bá 'dəji ta kí do-ti kete k̄i gogi rəm tɔ.

¹¹ K̄ɔ-je kí Kristi* à kingə, k̄i riba kí à kingə go-ti bá Ndil-é kí isi meɛ-dé-ti tɔji-dé kete kinlé, de 'ndər gin-é n̄a kdo koo se à to dokaglo kí rá-ti, ə à ra né k̄i kəm rəbi kí ban wa?

* **1:11 1:11** Kristi lé kɔr meɛ-é to dow kí Lubə mbəti-é.

12 Lubə toji-dé adi 'gə kí né-je kí de 'pa ta-é kinlé, sobi do-dé de al, ngà sobi do-si səi. Befə bone bè njékilə mbə Poyta kí Maji 'pa d'adi-si kì tógi lə Ndil kí aa njay kí Lubə adi-é i dora-ti ree ro-dé-ti lé ə malayka-je kàrè 'ndigi kadi 'gə mēə Poyta kí Maji kinlé to.

Panjiyə ngan lə Lubə

1Te 5:8-9; Tit 2:11-14

13 Gin-é kin fá, isi kəm do ro-si-ti, indəi kəmkəa do ro-si-ti ə adi mēə-si bikti lay ya tò kì do maji-ti kí à toki ra sə-si ndo-ti kí Jeju Kristi à toji-né ro-é ndaa-ti rəsi takəm dow-je-ti.

14 Səi lé, 'toi ngan-je kí njétəl ro-si go ta-ti, ón é bo né-je kí ndoki ra-si loki isi-né do mbə-ti bəy kinlé, adi ra-si gogi al ngá;

15 ngà adi panjiyə-si lay ya aa njay titi kí Lubə kí njəba-si aa-né njay kin bè to.

16 Kdotalə 'ndangi 'panè: Aai njay, kdo mə lé m'aa njay.

17 Lubə kí isi 'pai siə ta ə 'bai-é Bəbi-si lé, e to njəkər kəm dow al, adi e gangta do nə-nə-ti kì go kullə ra-é; ón é bal kisi kì do taá lə-si donangi-ti nè lé, adi panjiyə-si ilə kuji do-é-ti.

18 Səi 'gəi maji kí to là-je, kì lər-je kí à tuji kin fá Lubə gangi-né do-si lo né ra-ti kí do mbə-ti kí bəbi-si-je d'oji-si-né kin al;

19 ngà to məsi Kristi kí gati-é al do lo, kí toki məsi ngonbati kí məti goto ro-é-ti rəm, né kí maji al goto ro-é-ti rəm kin fá Lubə taa-si-né ilə-si taá.

20 Kristi lé, Lubə mbəti-é kete nò kində gin
donangi-ti nu,
ya ngà ɛ adi-é toji rə-é mɛɛ ndo-je-ti kí dɔbəy-ti
kdo maji lə-si.

21 Kì takul-é bá səi adi-né mɛɛ-si Lubə
kí adi-é tosi ndəl ində lo tɛɛ dan dow-je-ti kí d'oy
rəm,
ulə rība do-é-ti rəm;
bè kdo kadi adi-né mɛɛ-si Lubə rəm,
indəi-né mɛɛ-si do-é-ti rəm.

22 Səi 'təli rə-si go ta-ti kí togrə-ti adi 'toi dow-
je kí aai njay, kdo kadi 'ndigi-nə ndigi kí togrə-ti
titi kí 'toi-né ngankə-nə-je, ɛn é 'ndigi-nə ndigi kí
kərkəm-nə, kə kədkəm goto-ti.

23 Səi lé, to ta lə Lubə kí tò kəm rəm, tò lo tò-
é-ti sartagangi rəm kin bá oji-si koji kí sigi; bi to
koi lə bobi-si-je kí d'a koy ndo madi kin al;

24 kdotalə 'ndangi mɛɛ mbete-ti kí aa njay
'panè:

Dow-je lay ya 'toki wale bè;
ə rība lə-dé toki puti wale bè;
wale lé tuti ə puti-é ur,

25 ngà ta lə 'Babe tò lo tò-é-ti sartagangi.
Ə ta kinlé, ɛ bá to Poyta kí Maji kí d'ilə mbə-é
d'adi-si lé.

2

1 Beba né lay kí to kullə mɛɛndul, kə né lay kí
to kullə kədi dow-je, kə kədkəm dow-je, kə jangi-
je, kə né lay kí to kulə ta ndil-nə-ti-je kinlé, 'tusi
inəi kogi.

² Adi bo ta læ Lubə kí to mba kí aa yéréré kin bá ra-si titi kí bo mba ra-né ngan-je kí bər kin bè, kɔ kadi 'togi-né ə 'teɛi-né kaji-ti,

³ kɔɔtalə səi 'nəi ooi adi 'gəi kí 'Babe maji.

⁴ 'Reei rɔ 'Babe-ti kí toki ər kí tò kəm, kí dow-je 'mbati, ngà Lubə mbəti adi to né kí gati-é n̄a ta kəm-é-ti†.

⁵ Səi ya kàrè 'toi ki ər-je kí tò kəm bè, é indəi rɔ-si nati kadi 'təli kəy kisi Ndil kí aa njay rəm, kadi 'toi njégugnə-je kí aai njay, kɔ kadi Ndil kí aa njay ra adi adi kadkare kí nəl Lubə k̄i takul Jeju Kristi.

⁶ Kɔɔtalə 'ndàngi m̄eɛ mbete-ti kí aa njay 'panè: Ooi, mə Lubə m'mbəti ər kí gati-é n̄a, bá m'ində sul kəy-ti m̄eɛ bebo Siyɔ-ti*. Dow kí adi-é m̄eɛ-é ə rɔ-é à sol-é al.

⁷ Adi səi njékadm̄eɛ-je lé, səi bá riba tò dɔ-si-ti. Ngà rɔ njém̄eɛnḡa-je-ti rəmə, ər kí njékində kəy-je d'ilə p̄iringi kɔgi lé, bá təl to ər kí maji kí sul kəy-ti† rəm, to ər kí tugə dow-je jigi-ti rəm, to ər kí à ra dow-je kadi 'tusi‡ rəm.

⁸ Dɛ, 'tugə nja-dé ər-ti lé 'teɛ d'usi, kɔ 'mbati təl rɔ-dé go ta-ti læ Lubə; gin-é kin bá kusi kinlé tò ngəbi-dé-né.

⁹ †Ngà səi njékadm̄eɛ-je rəmə, səi 'toi gin dow-je kí Lubə mbəti-si rəm, 'toi njégugnə-je læ Lubə kí to ngar rəm, 'toi gin dow-je kí aai njay rəm, 'toi gin dow-je kí Lubə gangi dɔ-si, kɔ kadi iləi mbɛ néra-je kí maji-maji liə ɛ kí njəba-si kadi ji

† 2:4 2:4 Epe 2:20-22; Mat 21:42-44; Ròm 9:24-33 * 2:6 2:6 Eja 28:16 † 2:7 2:7 Pa 118:22 ‡ 2:7 2:7 Eja 8:14 † 2:9 2:9 Tit 2:14

londul-ti 'reei londógi-ti liə kí maji n̄a.

¹⁰ Səi lé ndɔki 'toi gin dow-je madi al, ngà bone bè 'toi gin dow-je liə; ndɔki Lubə oo kəmtondoo lə-si al, ngà bone bè Lubə oo kəmtondoo lə-si.

Panjiyə njékadmęę-je kí rɔ njékadmęę al-je-ti rəm, kí rɔ njékɔbe-je-ti

Rɔm 13:1-8; Ep̄e 6:5-8

¹¹ Səi kí m'ində-si dan kəm-m-ti lé, 'toi mba-je, njékɔw kí nja-si taá b́a m'ulə-né dingəm męę-si-ti kadi 'mbati b́o né-je kí maji al kí tò daji rɔ-si-ti isi rɔ kí ndil-si.

¹² Adi panjiyə-si maji dan njékadmęę al-je-ti, kɔ kadi lé d'isi d'ilə ta dɔ-si-ti 'panè 'toi dow-je kí njéra né kí maji al ya kàrè, d'oo kullə ra-si-je kí maji-maji kin rəmə, d'ɔsi-né gajì Lubə ndɔ kí à tęę-né dɔ-dé-ti.

¹³ Kɔ ta lə 'Babe lé, uləi dɔ-si gin tógi-ti lə ngar kɔ to kí ę to 'boy dɔ né-je-ti lay,

¹⁴ rəm uləi dɔ-si gin tógi-ti lə gubərnər-je, kɔ to kí dę 'to dow-je kí ngar ulə-dé kadi 'gangi ta dɔ dow-je-ti kí njéra né-je kí maji al ə 'piti dow-je kí njéra né-je kí maji.

¹⁵ Kɔtalə Lubə ndigi kadi 'rai maji kɔ kadi uwəi-né ta mbə-je kí njégə né al.

¹⁶ Adi panjiyə-si to panjiyə dow-je kí Lubə taa-dé ilə-dé taá; kę b́a adi taa kilə taá lə-si təl to né kɔn dɔ męęndul al; ngà kadi panjiyə-si to panjiyə ngannjékullə-je lə Lubə.

¹⁷ Uni ta dow-je lay; 'ndigi ngankɔ-si-je kí 'to njékadmęę-je, 'bəli Lubə, uni ta ngar.

Ta kí sɔbi dɔ njékadmęę-je kí 'to bə-je

18 Səi ngannjékullə-je, uləi dɔ-si gin tógi-ti lə 'ba-si-je kɪ bəl kɪ tɔgrɔ-ti; də kɪ 'maji rəm, 'sɔl ləm-ləm par b́a kadi uləi dɔ-si gin tógi-ti lə-dé al; ngà də kɪ 'ngə kàrè, uləi dɔ-si gin tógi-ti lə-dé tɔ.

19 Kdɔtalə k̀ kɪ dow ingə k̀ ndangi kare ya ə ore mɛɛ-é kɔ to kɪ ɛ to njèbəl Lubə lé to né kɪ maji.

20 Kdɔtalə kinə dow ingə k̀ kɔ né kɪ maji al kɪ ɛ ra b́a ore mɛɛ-é kàrè, piti ri b́a d'a piti-é wa? Ngà kinə dow ingə k̀ kɔ né kɪ maji kɪ ɛ ra b́a ore mɛɛ-é rəm, to né kɪ maji takəm Lubə-ti.

21 To né kin b́a Lubə ba-si kɔ;
kdɔtalə Kristi lé, ɛ ya kàrè ingə k̀ kɔ ta lə-si tɔ;
ɛ ra bè kɔ kadi təl néndaji kadi uni-né dɔ nja-é tɔ.

22 Kristi lé ra majal nja káre al rəm,
ədi dow nja káre al rəm;

23 b́a 'taji-é kàrè, ɛ taji-dé tó-ti al rəm,
d'adi-é k̀ kàrè, ɛ ay rɔ dɔ-dé-ti al rəm,
ngà ɛ inə rɔ-é ji Lubə-ti kɪ to njègangta kɪ njururu.

24 Kristi lé, ɛ ya ɔy majal-je lə-ji dɔ-é-ti ɔy-né dɔ kagdəsi-ti,

kɔ kadi j'oyi koy majal-je lə-ji lé
ə j'isi k̀ dɔ-ji taá kɔ néra kɪ njururu;
ɛ b́a ndunə dɔ-je liə aji-si.

25 Kdɔtalə, ndɔki ɔwi toki bati-je kɪ 'ndəm bè,
ngà bone bè səi 'təli 'reei rɔ njèkul-si-ti kɪ to njèngəm-si.

3

Ta kí sɔbi dɔ njétaa-na-je
1Ti 2:9-15; Epe 5:22-33

¹⁻² †Səi dené-je kàrè, uləi dɔ-si gin tógi-ti lə ngɔbi-si-je, kɔɔ kadi lé dɛ kí dan-ti-je 'mbati təl rɔ-dé go ta-ti lə Lubə kàrè, kadi 'təl njékadmeɛ-je kɔ takul panjiyə-si səi ne-dé-je, kɔɔ koo kí d'oo kí panjiyə-si maji rəm, kɔɔ kuji kí iləi dɔ-dé-ti rəm bi kɔ takul ta kí ta dow-ti al.

³ †Mɔnəi kɔ né-je kí rɔ-si-ti ndaa-ti nè kí to dɔ kí kuwə-je, kɔ 'ningó lɔr-je, kɔ kubi-je kí là-é n̄a-n̄a kin al,

⁴ ngà 'mɔnəi kɔ né-je kí bɔyɔ rɔ-é mɛɛ-si-ti, kí to né-je kí à tujɔ al, kí to panjiyə kí sɔl lɔm-lɔm rəm, kisi selele rəm; né-je kinlé bá, to né-je kí gati-é n̄a takəm Lubə-ti.

⁵ Gangi-é kin bá dené-je kí ndɔki 'to dené-je kí d'aa njay, kí 'to njékində mɛɛ-dé dɔ Lubə-ti 'mɔne-né ə d'ulə-né dɔ-dé gin tógi-ti lə ngɔbi-dé-je;

⁶ titi Sara kí təl rɔ-é go ta-ti lə Abrakam adi ba-é: 'Ba-m kin bè. Kinə adi bəl gangi mɛɛ-si al, adi 'rai maji kɔ mɛɛ-si kí nda kay rəmə, 'toi nganka Sara tɔ.

⁷ †Səi dingəm-je kàrè, isi kɔ ne-si-je ə 'gəi kí dɛ 'to dow-je kí tógi-dé asi al n̄a. Uni ta-dé kɔɔ dɛ kàrè d'ingə kaji kɔ takul ramaji lə Lubə nati sə-si tɔ; 'rai bè kɔ kadi né madi ilə-si kagi lo pa ta-ti kɔ Lubə al.

† 3:1-2 3:1-2 Epe 5:22; Kol 3:18 † 3:3 3:3 1Ti 2:9 † 3:7 3:7 Epe 5:25; Kol 3:19

Ta-je kí sɔbi dɔ ndigna
Rɔm 12:14-21; Mat 10:24-31

⁸ Kí kadi m'tol-né ta ta kin rəmə, səi lay ya kadi ɔwi kɪ tagir kí káre-rè rəm, adi mɛɛ-si asi-nə rəm. 'Ndigi-nə titi kí tuwə kadi ngankɔ-nə-je 'ndigi-né-nə, adi ta ɔ mɛɛ-si kɔ ta lə-nə ə 'soli dɔ-si nɔ-nə-ti.

⁹ Dow ra sə-si né kí maji al kàrè, 'rai siə né kí maji al tó-ti al rəm, b́a lé dow taji-si kàrè 'taji-é dɔ-si-ti al rəm; ngà 'tɔri ndi-si dɔ-é-ti; kdɔtalə né kin b́a to né kí Lubə ɓa-si kadi 'rai kɔ kadi ingəi-né tɔrndi tɔ.

¹⁰ Dow kí ndigi kadi n'isi kɪ dɔ-n'è taá ə n'isi dan maji-ti kɪ low-low rəmə, kadi dowb́e ngəm ndɔ-é lo pa ta-ti kí maji al ə ngəm ta-é dɔ kədi ta-ti,

¹¹ kadi ɔr rɔ-é kɔgi mɛɛ néra-ti kí maji al ə ra maji,

kadi sangi lapiya ə sangi kəm-é kɪ kete-kete.

¹² Kdɔtalə 'Babe ində kəm-é go dow-je-ti kí njéra né kí njururu

ə yəl mbi-é ɔɔ-né ta-je kí 'pa siə;

ngà 'Babe ɔsi ta njéra né-je kí maji al.

Kisi dɔ nja-ti kɔ pa ta kí dɔ nékində mɛɛ dɔ-ti

¹³ Kinə indəi rɔ-si ta ra né-ti kí maji lé, nə à ra-si maji al wa?

¹⁴ † kinə ingəi kɔ kdɔtalə néra kí njururu rəmə, səi 'toi njénékumə-je! Njéra né-je kí maji al lé, 'b́əli-dé al rəm, adi mɛɛ-si gangi man al rəm.

† 3:14 3:14 Mat 5:10

15 Ngà Kristi kí to 'Babe lé, kadi 'gøi mee-si-ti kí e aa njay ə isi pèrèrè kì ndo-je lay, kdo kadi kinə dow ndur gin kində mee do-ti læ-si rəmə idəi-é; ngà kidə bá idəi-é kì ta kí sol lom-lom rəm, kì kuji kí kilə rəm.

16 Adi tagir kí maji tò mee-si-ti, kdo kadi lé d'ilə ta do-si-ti kàrè, de njépata kí maji al do panjiyø-si-ti kí maji kí to panjiyø Kristi lé, ro-dé sol-dé.

17 Kdotalə kingə kò kdo néra kí maji lé, kinə to ndigi læ Lubə rəmə, to soti itə kingə kò kdo né ra kí maji al.

Ta kí sobi do koy kì tɔsi ndəl læ Kristi

18 Kdotalə Kristi kì do-é oy nja kàre-rè kdo majal-je;

e kí to njèra né kí njururu ya oy kdo njèra né-je kí njururu al,

kdo kadi ree sə-si ro Lubə-ti.

'Tol-é kdo to kí to dow, ngà Ndil kí aa njay adi-é tɔsi ndəl tɛɛ.

19 Kì takul Ndil kinlé bá ndoki, e ow ilə-né mbe Poyta kí Maji

adi ndil dow-je kí d'a dangay-ti koo tɔ.

20 De bá ndoki 'ra dɔngə, ya ngà Lubə ilə mee-é do madi-é-ti kì kete-kete mee ndo-je-ti kí Nuwe isi ra-né bato lé. Bato kinlé dow-je kí d'isi mee-é-ti d'aji ro-dé ta man-ti lé, de jinày joo-rè ya par bi 'nə al.

21 Né-je kin bá tɔji batəm kí aji-si ngosnè ə to batəm kí à kør né kí maji al ro dow-ti al, ngà to kun ro kadi Lubə kì tagir kí maji kì takul tɔsi ndəl kində lo tɛɛ læ Jeju Kristi.

²² Jezu Kristi lé, ow dora-ti, isi do jikol Lubə-ti; adi e bá malayka-je, kà njékɔbe-je, kà njétógi-je d'ulə do-dé gin tógi-ti liə.

4

Ta kí sɔbi do tusi panjiyə kí kete kinə

¹ Beba titi kí Kristi ingə-né kò daji ro-é-ti lé, səi kàrè adi tagir kí bè kin tò mee-si-ti maji to; kdotalə dow kí ingə kò daji ro-é-ti lé, to dow kí or ro-é kogi mee majal-ti,

² kdo kadi ndəgi ndo-je kí e à kisi-né kò do-é taá lé, isi kdo ra né-je kí maji al kí bo-é ra dow-je kin al, ngà isi kdo ra né kí Lubə ndigi.

³ Kdotalə ndoki lé isi ká ra né-je-ti kí nəl njèkadmeə al-je, adi to kisi ká ra kaya-ti, kò kəmnda, kò gɔyibi kí kay, kò gɔnəkuso, kò kində-nə dirə nékay, kò pole magi-je kí to né rɔsol.

⁴ Ngà bone bè səi ayi sə-dé ngodi go kaya-ti kí al do maji kin al ngá rəmə, d'oo ki né kí mba bè ro-dé-ti, adi 'pa ta-je kí maji al maji al do-si-ti.

⁵ Né-je kinlé, d'a kor go-é nò Kristi-ti kí a pèrèrè kdo gangta do dow-je-ti kí d'oy rəm, do dow-je-ti kí d'isi kəm rəm.

⁶ Gin-é kin bá dow-je kí d'oy kàrè d'ilə mbe Poyta kí Maji mbi-dé-ti kdo kadi lé 'gangi ta do-dé-ti titi kí 'gangi-né ta do dow-je-ti lay bè kàrè, Ndil kí aa njay adi d'isi kəm kò Lubə.

Né-je kí gay-gay kí njèkadmeə à ra

⁷ Né-je lay ya ta tol ta-é nàyi ngosi, én é indəi kəmkaa do ro-si-ti ə isi kəm do ro-si-ti kdo kadi 'pai ta kò Lubə.

⁸ Kete nò né-je-ti lay lé, 'ndigi-nā ndigi kí tɔgrɔ-ti, kdɔtalə ndignā lé uti dɔ majal-je nā* .

⁹ Uwəi-nā ki rɔ nā-ti, ə 'yuni-né ta go-ti al.

¹⁰ Nā-nā ya Lubə adi-é kadkare kí sɔbi dɔ-é é 'rai-né kullə adi-nā, beba à toi dow-je kí njékində kəm-dé maji go ramaji-ti lə Lubə kí tò gay-gay kin.

¹¹ Kinə dow à pa ta rəmə, kadi to ta-je kí ta Lubə-ti ya bane; ə kinə dow isi oo go dow-je rəmə, kadi oo go-dé kɪ tɔgi kí Lubə adi-é tɔ. Bè kdɔ kadi né-je lay ya Lubə ingə kɔsgaji mɛɛ-é-ti kɪ takul Jeju Kristi. Lubə lé, rɪba kɪ tɔgi to 'liə kɪ dɔ ɔal-ɔal. Amən!

Njénékumə bá ingə kɔ kdɔ Kristi

¹² Səi kí m'ində-si dan kəm-m-ti, kɔpər kí isi dan-ti kinlé to nənā mɛɛ-si koo ən é adi ra-si ɔəl al, nè à kɪ kooi kí to né kí mba bá tɛɛ dɔ-si-ti.

¹³ Kɔ-je kí ndɔki Kristi ingə lé, səi isi ingəi tɔ ən é 'rai rɔnəl; kdɔ kadi ndɔ kí ɛ à tɔji rɪba liə ndaa-ti rəsi lé, səi a rai rɔnəl ə a tiləi kole.

¹⁴ Kinə dow-je 'taji-si kdɔ Kristi lé, 'toi njénékumə-je, kdɔtalə ndil kí njèrɪba kí to ndil Lubə isi mɛɛ-si-ti.

¹⁵ Kadi dow madi dan-si-ti ingə kɔ kdɔ to kí to njètɔl dow-je al rəm, kdɔ to kí to njèbogi al rəm, kdɔ to kí to njèra né kí maji al al rəm, bá kdɔ to kí to njékində rɔ-é ta-ti lə dow-je al rəm.

¹⁶ Ngà kinə dow ingə kɔ kdɔ to kí ɛ to njèkun go Kristi rəmə, kadi rɔ-é sɔl-é al; ngà kadi dowbé

* **4:8 4:8** Kuti dɔ majal-je kí ta-é tò nè kinlé to ta kí sɔbi dɔ kuti majal-je kadi oo al al, ngà sɔbi kinə go majal-je kɔgi (Gos 10:12; Pa 32:1)

osi gajı Lubə kdo ri njèkun go Kristi kǐ tò do-é-ti kin.

¹⁷ Kdo kaglo asi kadi ta kǐ gangi à kulə gin-é meɛ kəy-ti lə Lubə. Ngà kinə jəi bǎ ta kǐ gangi ulə gin-é do-ji-ti lé, dow-je kǐ njəmbati kadi meɛ-dé Poyta kǐ Maji lə Lubə kin ta təl ta-dé à tò ban ngá én wa?

¹⁸ Ə kinə njəra né kǐ njururu ya lo kaji liə ngə nǎ bə lé, njèkilə kuji do Lubə-ti al kǐ to njəra majal əjè 'liə à tò ban ngá wa?

¹⁹ Beba dow-je kǐ d'ingə k̀ do meɛ ndigi lə Lubə lé, kadi d'inə ro-dé ji njəkə do ndi-é-ti kǐ to njèkində né-je lay ə kadi 'ra maji.

5

Takoji kǐ sobi do 'ngatógi-je, kǐ njəkadməɛ-je

1Ti 3:1-7

¹ Beba 'ngatógi-je kǐ d'isi dan-si-ti lé, mə kǐ m'to 'ngatógi madi-dé m'ulə dingəm meɛ-dé-ti. Mə lé, k̀-je kǐ Kristi ingə kàrè m'a lo-é-ti m'oo kǐ kəm-m rəm, bǎ rıba liə kǐ Lubə à toji ndaa-ti rəsi lé kàrè m'a kə lo-é-ti rəm to.

² †M'ulə dingəm meɛ-dé-ti m'panè: Uli bati-je lə Lubə kǐ ində-si ta-dé-ti; uli-dé kǐ meɛ ndigi lə-si kǐ gangi-é kǐ nəl Lubə ya bi titi né kǐ dow uwə-si kǐ lə njətógi-ti bə al rəm, 'rai kǐ kullə là al rəm, ngà uli-dé kǐ meɛnda kəy.

³ Bati-je kǐ Lubə ində-si ta-dé-ti kinlé, 'rai ngar do-dé-ti al, ngà 'təli néndaji kadi 'ndaji.

⁴ Beba loki njèkul bati-je kǐ boy à ree lé, səi a kingəi jəgi rıba kǐ ndole-é à goto al.

† 5:2 5:2 Jə 21:15-17

⁵ Bè ya to, səi basa-je kàrè uləi do-si gin tógi-ti læ 'ngatógi-je to. Səi lay ya 'soli do-si lom-lom nò-ña-ti. Kdo Lubə ɔsi ta njékində kàdi-dé-je, ngə ɛ ramaji kí njəsəl do-dé-je.*

⁶ †Ən é 'soli do-si nò Lubə-ti kí tógi-é asi gaki kin, kdo kadi kaglo kí mɛɛ-é ndigi ə itə do-si ki taá.

⁷ Né-je lay kí mɛɛ-si ɔ kəkəkə kdo lé, inəi mɛɛ ji-é-ti, kdotalə ɛ to njəkoo go-si.†

Kò-je kə riba læ njəkadmɛɛ-je

⁸ Indəi kəmkaa do ro-si-ti. Isi kəm do ro-si-ti. Njəba læ-si kí to Sú isi ijə ro toki bəl bè, ilə gəə do-si, isi sangi dow kí n'a tuji-é. ⁹ 'Ndangi-é ə ɔi gərərə do kadmɛɛ-ti læ-si, ə kadi 'gəi kí kò-je kí isi ingəi kinlé, ngankɔ-si-je kí njəkadmɛɛ d'isi d'ingə kəl lo-je-ti kí rangi donangi-ti nè bè ya to.

¹⁰ Go kò-je-ti kí tò kadi à kingəi kaglo sɛ bəy kinlé, Lubə kí to njəramaji mɛɛ né-je-ti lay kí ba-si kə takul Kristi, kdo kadi ingəi riba liə kí à to sartagangi lé, à təl kində-si d'irə-ti kí mbaa so rəm, à mbusi nja-si rəm, à kadi-si tógi rəm, bá à ra sə-si kadi ɔi lo kə-si-ti gərərə rəm to.

¹¹ Ɛ ya tógi to 'liə kə do bal-bal! Amən!

Sɔy ta-je kə lapiya kí ra

1Te 5:23-28

¹² †Kə takul ngonkɔ-m Silbɛ‡ kí to njəkə do ndi-é-ti, bá m'ndangi-né ta-je kí sɛ kin m'adi-si,

* **5:5 5:5** Gos 3:34; Jak 4:6 † **5:6 5:6** Mat 23:12; Luk 14:11; 18:14 † **5:7 5:7** Pa 55:23 † **5:12 5:12** Knj 15:22,40 ‡ **5:12 5:12** Silbɛ lé ya to Silasi. Knj 15:22; 2Kɔ 1:19

kdo kulə-né dingəm mēē-si-ti rəm, kdo kidə-si-né rəsi kí ramaji lə Lubə kí ǵi dɔ-ti kinlé ę ya to ramaji kí tɔgrɔ-ti.

¹³ †Njékəwnə-je kí Lubə mbəti-dé kí d'isi bebo Babilɔn-ti 'ra-si lapiya rəm, fá Marki kí m'oo-é kí ngon mēē-m bè kin kàrè ra-si lapiya to.

¹⁴ 'Rai-nə lapiya kuwə-nə kàdi-nə-ti kdo ndigi kí 'ndigi-nə. Səi lay kí 'nami kàdi Kristi-ti lé, kadi lapiya nəy sə-si!

† 5:13 5:13 Knj 12:12,25; 13:13; 15:37-39; Kol 4:10; Plm 1:24

Mango
Mango: Ta lə Lubə Kunmindí kí Sigi (New
Testament)

copyright © 2018 Wycliffe Bible Translators, Inc.

Language: Mango

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025

96bdbd07-24d6-556c-9e7c-7269c72880cd